

Date – 23/06/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma'n 2024-25 Budget-ah sum tam zawk pe turin Central sawrkar a ngen.
2. Thla thar, July ni 1 atanga hman ñan tura sawrkar laipuiin dan thar a siam, New Criminal Laws of India 2023 hmang turin Mizoram a inpeih tawh
3. Cyclone Remal avanga Mizoram hmun hrang hranga chhiatna thleng endik tura sawrkar laipuiin a ruat, 'Inter-Ministerial Central Team' in Sairang, Sairang Dinthar leh Sihmuia tui lian vanga chhiatna hrang hrang an endik tan.

<><><>

NEW CRIMINAL LAWS

Thla thar, July ni 1 atanga hman ñan tura sawrkar laipuiin dan thar a siam, New Criminal Laws of India 2023 hmang turin Mizoram a inpeih tawh a, Vantlang tana hnathawh hmanga inhremna a awm tawh dawn

Mizoram Law College-a Assistant Professor Dr. Maria Lalrinmawii sawi danin he dan tharin a tum ber chu dan hman lai mek chuan tunlai thiamna leh hmasawn mekna a pha tawh lo va, churang chuan he dan thar hnuaiiah hian pawikhawihna thenkhat hremna tihsana harsatna ñhenkhat thuneihnain a huam chin tihchian leh dan bung leh chang hman tlak tawh loh paih te a ni.

Dr Maria Lalrinmawii sawi danin IPC tih thin chu Bharatiya Nyaya Sanhita (BNS) 2023 tih a ni tawh ang a, CRPC chu Bharatiya Nagarik Suraksha Sanhita (BNSS) ni tawhin Indian Evidence Act ni ñthin chu Bharatiya Sakshya Adhinyam (BSA) a ni tawh dawn bawk.

Law College Asst Professor sawi danin he dan tharah hian hmeichhia leh naupang chung a pawikhawihna hremna a awm belh a, Penal Code mi hrem theih nana hmasa ber atan Vantlang hnathawh a dah thar a, a hmaa IPC ni thin nena danglamna lian zualah dan bawhchhiatna jail tan theihna chi 33 a awm belh a, heng bakah hian dan bawhchhiatna sum leh pawisa chawitir theihna chu 83-in a tam ta zawk a ni.

Dr. Maria Lalrinmawii chuan Dan tharah hian vantlang tana hnathawh chu hmun tam takah an rawn pe tawh dawn, a ti a; a bik takin zu ruiah avanga buaina siam te leh vantlang tana hnawksaka awm te hrem thin an ni dawn a, he dan thar hnuaiiah hian a huhoa mi khawih, Mob Lynching chu a tlem berah kum 7 tal tan theih turin dah a ni tih sawiin a bul tumtu nih kher loh pawhin inhnammawih vangin a tan theih dawn, a ti a. Dan thar tha tak tak hmang tangkai theitu chu mipuite an ni tih pawh sawiin mipuite hamthatna atana Dan siam anih ang ngeia hman tangkai leh ngaihven a pawimawh a ti bawk.

Hetihlai hian, Excise & Narcotics Department chuan tunhnai atang khan zu avanga dan bawhchhia an man court-in thiam loh a chantir thenkhatte chu vantlang hna an thawhtir thin a. Excise & Narcotics Dept. tarlan danin, vantlang hmuna zu rui leh midang tana buaina siam, court-in thianloh a chantir thenkhat chu Mizoram Liquor (Prohibition) Act, 2019 tlawhchhanin venhima hnuaijah jail tantir lovin vantlang hna thawhtir thin an ni. Court-in a rel angin ni hnih thum velte vantlang hna thawhtir an ni a, an thawh zawhah hawin, a tukah an in-report leh thin. Dan chuan ni khatah darkar 12 aia rei lo thawhtir tur a ti a, a tlangpuuin darkar 2-3 vel thawhtir an ni thin. Zu vanga man vantlang hna thawhtir hi kalpui chhunzawm zel tum a ni.

<><><>

INTER MINISTERIAL TEAM

Cyclone Remal avanga Mizoram hmun hrang hranga chhiatna thleng endik tura sawrkar laipuiin a ruat, 'Inter-Ministerial Central Team' ten Sairang, Sairang Dinthar leh Sihhmuia tui lian vanga chhiatna hrang hrang an endik tan.

Central Team te hi Zirtawpni khan Mizoram lo thlengin tlaiah Sairang leh Sihhmuia chhiatna thlen dan an enfiah nghal a, Mizoram sorkar aiawhte leh Sihhmui VC hruaituten an tawiawm a ni.

Inter-Ministerial Central Team-te hi tun kar Thawhlejni thleng an cham ang a, an cham chhung hian Greater Aizawl Water Supply Scheme Phase I & II, Melthum leh Hlimen leimin te, Kulikawn leh ITI veng thlanmual te, ZMC Falkawn leimin hlauhawm lai te, Aizawl - Aibawk - Darlung inkar kawng te, Durtlang leh Kanan veng thlanmual te leh Zawlpui zau, Serchhip te an tlawh dawn a ni.

<><><>

FREE CLINIC

Central YMA leh Mizoram Chemist & Druggist Association tangkawp chuan nimin khan Tawngtai Bethel Camping Centre (TBCC), Sakawrtuichhun-ah medical health camp an buatsaih.

TBCC-a medical health camp-ah hian doctor 11, Mizoram Synod hnuaijah missionary nurse thawk mek, medical refresher course training lai mi 10, Aizawl Hospital atangin Ophthalmic Assistant 3 ten tlawmngaiin damlote hriselna dinhmun an endik a, Mizoram Chemist & Druggist Association ten damlo te ei tur Nuai 5 man vel an tum bawk a ni.

Tawngtai Bethel Camping Center-ah hian hmeichhia 142 leh mipa 973, an vaiin mi 1,211 an awm mek.

<><><>

CM LALDUHOMA IN N. DELHI

Union Finance Minister, Nirmala Sitharaman-i kaihhruiin nimin khan ram chhunga State leh UT zawng zawnga Finance Minister ten Pre Budget Meeting an nei a. He hunah hian Chief Minister Pu Lalduhoma, Finance Minister ni baw k chuan thu a sawi.

Chief Minister hian Mizoram hian hun rei tak rambuai a tawrh avangin hmasawna hnathawh a hmu tlai bik a. 5th Five Year Plan atang khan mumalin a kal ve chauh a, chuang chuan state dangte dinhmuna ding ve phak turin sum leh pai mamawhna a sang hle, a ti a. Sum mamawh te mahnia thawk chhuak turin state dangte angin Industry tihtham a nei baw k si lova, ngaihtuah an ngai hle a ni, a ti a. Tunah state ralmuang tak ni tawh mah se thenawm state-te leh ram tea harsatna thleng avangin Mizoram rawn bel tura rawn lut an ngah hle a, an tan phurrit a tling, a ti a. Security Related Expenditure (SRE) hi central sawrkarin a pek ve loh laiin thenawm state leh ram atanga hel pawlte laka invenhim ve reng an ngai baw k a, Peace Dividend siamsak an mamawh a ni, a ti.

Chief Minister chuan a kaihhrui sawrkar chu Mizorama thil thar danglam thlentir tum tlat an ni a; chumi atana an mamawh hmasa chu sum leh pai tam zawk a nih avangin 2024-25 Budget-ah sum tam zawk pe turin Central sawrkar a ngen. 15th Finance Commission khan Mizoram tan Special Grant Cheng Vbch 546 a ruahman a, mahse hei hi Mizoram a la dawng kim lo nasa hle a. 2019-20 leh 2020-21 budget-a Share of Taxes atanga Mizoram dawn tur Cheng Vbch 2,370 leh Nuai 80 an la dawng lo baw k a; heng an sum dawn loh te avanga an leiba te hi vawiin thlengin an la chhawm si a, sorkar laipuiin a chinfelna dapsak thei se an duh em em tih a sawi baw k.

Chief Minister hian 14th leh 15th Finance Commission ten rawtna an siam anga professional tax rate ennawn thuai tha a tih thu te, Centrally Sponsor Scheme sum te Single Nodal Agency-a pek chhuahna dan chuan Central Treasury Rules a mil zan lo deuh nia a hriat thu te, Mizoram chu ram kilkhawr, ni tin mamawh man to fal bikna a nih avanga Special Package pek a mamawh thu te, Externally Aided Projects atana sum hmuh theih bithliah chu ennawn deuh thaa a hriat thu leh SASCI sum hman dan tur awlsam deuh zawk duan tha a tih thu te a sawi a ni.

Pu Lalduhoma hian Union, State leh UT tin Finance Minister te chu India chu ram intodelh zawk, hmasawna inkhairual, state tin, hnam tin leh khua leh tui zawng zawng tumah ngaihthah bik awm lohna rama siam tura thawhhoipiah a sawm a ni.

<><><>

WEATHER FORECAST

Indian Metereological Department Aizawl Center chuan kumin hian Mizoram ruahtui a dawng tam dawn nia hriat a nih thu an sawi.

IMD Aizawl Centre Director, Sudheer Kumar Dwivedi-a chuan kumin chhung hriat theih chinah nikum nena khaihkhinin ruahtui mm 100 velin a tla tam tawh zawk a, kumin January thla atanga June thla thleng khan Mizoram pumah ruahtui milimeter 620 dawn a tla tawh a, a hun chhung inang-ah nikum khan ruahtui milimeter 600 vel a tla thung a ni.

District mala chhut chuan Kolasib chu ruahtui tla pun nasat berna hmun niin, January atanga June thleng khan milimeter 1,111 vel a tla tawh a, nikum khan a hun chhung inangah ruahtui milimeter 684.30 a tla thung.

Champhai District chu ruahtui tlak tlem berna hmun a ni a, kuminah milimeter 185 chauh a la tlak laiin nikum khan milimeter 440 a tla a ni.

Khawvel sik leh sa inthlak danglam nasa leh boruak lum chho zelah Mizoram pawhin kawng hrang hrangin a tuar chho ve a; global warming-in a nghawng langsar zingah ruahsur dan hi a tel a, hmun hrang hranga ruahtui tlak dan a danglam nasa hle a, a thenah nasa taka a sur laiin thenkhatin ruahtui an hmu tlem em em thung a, a sur danah pawh hmun thenkhatah a sur miah loh laiin hmun dangah chuan a tla tam chi, leilung pawhin a tawrh phah theih hial khawp tein a sur thin a ni.

<><><>

MOBILE LOK ADALAT

Mizoram State Legal Service Authority ruahmanin nimin khan District Legal Service Authority Serchhip chuan Thenzawl West VC House, Bazar vengah Mobile Lok Adalat a buatsaih a. He Mobile Lok Adalat-ah hian Pi Josangzeli Tlau MJS, Secretary District DLSA leh a thawhpuite bakah Conciliator pahnih an tel a ni.

Mobile Lok Adalat-ah hian Bank Loan puk rulh loh chungchangah thubuai 16 ziah luh a ni a. Heng zinga thubuai 9 chu nimin khan chin fel a ni a, Cheng Nuai 26 Sing 9 vel hu chin fel a ni.

<><><>

LAWNGTLAI - PWD

Kumtina an tih thin angin PWD Lawngtlai Division chuan Lawngtlai khawpui chhunga an enkawl kawngpui kam tihfai leh tuihawk luankawr thenfai hna tunlai hian an thawk mek.

PWD Lawngtlai Division hian khawpui chhunga an enkawl kawngpui thawmthat ngai te chu thal laiin a theih ang angin an thawm tha a, fur intan dawnin kawngpui kam leh tuihawk luankawrte an thianfai thin a, ruahtui a tlak hnuah leimin leh bawlhhlawh ten tuihawkluankawr a hnawh te a khat tawkin an thianfai reng baw.

Tunlai hian Lawngtlai khawpui chhungah beihpui thlak lehin kawngpui kam hnimte samfaiin tuihawk luankawr an thianfai mek a, an thawh tura ruahman tam zawk chu an zo fel tawh.

PWD hotute chuan tuihawk vanga harsatna thleng thei lakah khawpui a him zawk nan mahni in leh a vel te en uluk tur leh tuihawk luankawr hnawh ping thei zawng a tumah khawsa lo turin mipui an ngen.

<><><>